

四庫全書

集部

欽定四庫全書

集部

彭惠安集卷六

十

詳校官庶吉士_臣陳若霖

中書_臣劉源溥覆勘

總校官中書_臣朱鈐

校對官中書_臣李荃

謄錄監生_臣任楫文

欽定四庫全書

彭惠安集卷六

明 彭韶 撰

祭文

祭朱士傑都憲文

周重師保漢建三公必有元老位寄兼崇始公未入人
仰肅風曰韓與范經畧軍中迨公既至人瞻德容曰文
與當夢卜攸同焉為其然素履篤忠武以禦侮文以華

躬昔在廣藩寇起嶺東公別淑慝弱撫強攻遺黎獲免
血刃膏鋒採珠鉅後誰恤民窮公馳密疏感動宸衷一
封停詔懽聲融融布政關閩譽望益隆乃都風憲撫鎮
西戎帝顧兩廣久如潰癰移公總制曰惟舊封公也敬
賢恤民重農處事周悉罔間纖洪醜類肆虐毒矢長弓
諄諄化誘披露襟胃振揚威武以待弗從推心納降芥
彼奸克五管以寧兩江載通承平如故民阜物豐凡此
推廊惟公之功擢正中臺仍傳青宮星象垂異天啟聖

聰聯章以諫善類所宗曾未期月降此鞠凶騎箕長逝
朝著其空皇情震悼百辟哀恫匪無宏材匪無鉅工懇
懇體國未見斯翁某辱故吏幸會是逢知己莫報負愧
冥濛茲返柩車南望灞宮雪涕寄奠以誓始終

祭翁冰崖尚書文

惟公博達明慎端厚坦直吏事精能書法俊逸汪洋度
量茹納無迹恢廓規模為時巨擘方事紛擾公私填溢
談笑處之人嗟敏給或勢危疑禍機激射勇前當之人

為惕息左圖右書千卷萬帙手不停揮人推大筆前條
後例有因有革議事以制人服多識橋梓聯輝伯仲合
璧科名接武金紫相襲公始為郎金穀是職譽望隆洽
坐登顯秩擢貳司空拯民之急力請作坊減損工織謫
臨蒸_關武夫構隙逮獄錦衣聖情斯惻仰荷生成告者反
斥成化改元遂都邦伯大江之西流聲煇赫漸起舊臣
內臺以陟巡撫東山三載成績司徒乏佐公其邁入乃
董京儲紅腐山積乃位八座望冠羣辟累疏乞骸臣已

年及有詔勿朝勉理煩劇公拜稽言敢不力疾義所未
安雖死無益蒙恩許歸加禮優秩宮保進階無俾家食
月授之粢歲給之力凡此異數褒表忠赤非公莫致用
光今昔駕言行邁舍彼淮驛故知留飲微覺不憚中道
遽喪未底家室柩車南旋行道於悵遣使葬祭皇有殊
錫生榮死哀世所罕匹某等曾厠末僚或同鄉邑沐愛
有年酬知何日茲聞訃音莫不沾臆豈曰吾私為世嗟
惜馳酬一搏恨不羽翼叙哀成章言非藻飾堂堂如生

庶其來格

祭吳尚忠都憲文

惟滇之內為坤之維外控百番內制諸夷大將世守常
侍協持臺臣總理權假便宜公起方岳既撫楚師帝顧
交人在彼藩籬老成遣鎮牙纛載移大距斯脫百孔是
彌改紀庶政威聲四馳八百用命樹搃戡黎叩人來告
課增倍奇人力不堪公䟽哀祈天聽雖高民心則怡屯
田歲入實多漏卮公室蠹穴微斂以時西人方戴忽焉

騎箕返柩來東駐幄于茲惟茲貴陽公有去思待公不
來而以喪歸辱官隣封久仰清規歲時音問使价不遺
今而已矣迄無其期率屬以奠雲物增悲

祭張宗器都憲文

追惟昔者正統之季公方弱冠巍然甲第聰明英偉一
時寡二仕優而學刻志無替經集子史下至書計含咀
搜羅博通強記揮翰如飛應酬罔滯海內嚮風徧攬俊
乂武可折衝文可經世允為通人展也國器始居水部

陰陽為沴公言滂甚道殣莫瘞宜預發廩以續生意朝
議從之令譽日至瞻彼太原北門屏蔽授公專城蓋欲
外試乃遭家艱解歸守制再調四明政尤卓異化洽循
良法屈常侍陟叅嶺省時乃儲備軍旅歲興饋運相繼
遷牧于浙扶衰補敝厥聲皇皇達于四際帝顧西川民
蕃物熾俾長內臺撫循其地發摘如神奸豪斂避披閱
咨詢莫辭勞勩征播伐松人服膽氣遷瀘定黔誰能建
置加祿延賞司徒是貳母也云亡蒙恩葬祭公居草土

其能有幾董漕缺人都憲復莅此職之難國賦攸寄歲
五百萬非力莫致士困盤博備極勞費公往蘇之庶其
少憇上供留使萬舸來暨上下胥懽初豈附麗三孤八
座跬步可企胡不降康頻見下瘠皇命醫來投以良劑
民之無祿竟爾長逝當宁興嗟縉紳隕涕某等日忝僚
屬亦有年契隔閭數載情言莫既茲聞訃來北風吹袂
洒淚邊城馳神漢涇用陳微牲兼以清齋專使往奠公
其勿棄

祭韓永熙都憲文

惟公負軒豁之資具文武之器尚功喜為勉脩好義由
五陵之年少登南宮之甲第拜官裏行見事風起剛斷
有聲奸豪斂避乃按察於外服暫離海隅遂僉書於內
臺益揚風紀巡撫大江之西剗削百年之弊草木知名
豺狼遠逝慨重剛而過中再貶斥而坐廢未幾賜環復
移棘寺進副本兵匪人曷比出叅名藩蠻氛方熾長子
帥師仗鉞節制斷藤告捷我軍增氣折馘執俘動千萬

計列郡賴之始有生意兩廣再造非公莫致揮翰若飛
人服公藝決事如流人服公智長才遠畧文饒可繼御
史大夫三公之貳未老謝事聖明所昇樂一觴而一咏
又何憂而何忌云胡弗疾一夕而斃縉紳為之失聲百
越為之罷市懷德思功曷其有既某等竊官嶺表熟聞
公是茲成小康實謝餘庇畏簡書之有嚴抱生芻而莫
置謹走使价薄薦牲醴

祭黃庭獻亞卿文

緊宦途之擾擾兮慨衣食之不豐瑟縮不能出戶兮夫
豈委蛇乎自公嘆明靈之獨異兮不混混以為通脫蟬
蛻於汙濁兮振鴻飛於冥濛爰以簡而自命兮誓畢吾
生以相從昔冢宰魏夫子兮一見公而改容遂馳名於
後造兮徘徊乎郎署之中彼吳下之紛華兮乃百貨之
所鍾公徃使乎其間兮垂一橐其屢空出叅預而典藩
兮自江右而浙東旋召環而登用兮少司徒之優崇分
留務於南都兮曰四海之所宗寬帝顧之西憂兮玉節

迺邈乎蠶叢蟲賊屏迹以遠去兮民俗藹其和同老臣
不可久外兮肆納命於上宮何彼蒼之不弔兮遽一疾
而長終嗟欲詰之無因兮信神理之難窮某等忝承節
制兮久欽德風南望閩山兮臨穴弗躬敬寓一觴兮以
寫哀衷

祭陳孟寬知縣親家文

惟公資性開朗兮坦實不欺彬彬君子兮後學之師門
戶甚正兮趣向甚夷提身以禮兮介特自持處事以義

兮劑量得宜不謫不瀆兮公是公非善談名理兮聽者
忘疲惟造詣之獨得兮騁雄偉之宏詞久遨遊於芹泮
兮不見售於主司年既強而始獲兮登甲第之巍巍期
晚成而大用兮僅試邑於江涯實賦與之定分兮非人
力之可為勤脩職業兮孰計崇卑六事克舉兮芑苴莫
施平易及民兮民其愛之政成美解兮喬遷有期徑歸
展墓兮浮榮若遺書來報我兮年已及耆青山可樂兮
白雲可怡予為蚺蛙兮從吏不疑歲月幾何兮曾不旬

時書猶未達兮公疾弗醫兒女姻婭兮重以故知離多
會少兮中心孔悲茲胡遠逝兮莫恤我私進誰相從兮
老誰相依南望故鄉兮山川渺瀰佇立反袂兮泣涕漣
漉椒醕寄奠兮公其格斯

哀李英玉先生詞

有序李諱瑩別號守愚

李徵士先生與先刑部府君蚤以儒士相往還韶獲拜
之先生試于鄉不售退而教授于城南務巷以詩文自
娛再遷于後棠村遂定居焉先生資性坦直出語即見

肝肺人無賢愚皆樂就之方壯時有司兩以明經薦皆
辭不赴最後以賢良徵鄉士大夫咸欲先生一起迺勸
行先生勉從至京師銓曹試其能亟稱焉移文覈實將
授官先生不幸卒于旅舍蓋莫非命也韶早辱先生知
愛叨忝今日方喜得求誨以無負初心而先生不可作
矣嗚呼哀哉孰知我悲乃為哀詞以寄予情云

吁嗟生死兮晝夜之常生順死安兮其又何傷先生奚
死兮客于帝鄉文則多有兮材又孔良胡不乘時兮奮

飛四方困彼場屋兮幾閱星霜棠村嘉遜兮身隱名彰

明經再薦兮乃入觀光故人

尹

冢宰兮汲引弗忘匪私

是暱兮職在明揚大堪任邑兮小列儒庠一命非侈兮
行道可望乃猶弗獲兮實命不臧魂魄何之兮淒迷故
疆風神如在今月滿屋梁嗟哉先生兮似是而亡丹旄翩
翩兮白露瀼瀼言念疇昔兮實沾我裳三尺之墳兮于
彼道傍百世人知兮有道其藏

彭惠安集卷六

欽定四庫全書

彭惠安集卷七

明 彭韶 撰

墓表

雲南丘副使拙菴公墓表

弘治二年八月莆致政雲南按察司副使丘公卒越又
明年十月四日葬于邑谷清里白塔山之原翰林編修
徐先生瑞既銘其墓矣其孤郡庠生守淵欲表顯之致

書奉刑部郎中朱君悌狀來屬余余與公有姻契好是不可辭公諱山字安重別號拙菴姿貌明秀性氣溫悃自少便入佳士之日常慕元儒盧齊韓之為人於遺篇諷之甚習有所吟作類其格調而興致幽遠大有能詩聲且妙書法同里林庭芳先生永樂進士負重望罷新會令為學者師奇公才女馬踰冠遊邑庠治舉子業精專不怠於時攻時文者多不事雜作獨公兼之而聲名益振竹岩學士柯先生時歸省在家深所器重天順乙

卯舉閩藩鄉薦高等城南諸生相率從公學若郎中朱君悌博士鄭君繼皆公徒也閱兩會試至成化丙戌登羅倫榜進士觀政工部承朝命往甘肅散賞有功官軍畢事歸總戎遺以貂裘異物俱卻不受越明年授溫州府瑞安縣知縣縣號煩劇人民樂奢豪猾至不肯奉法貧富生女多不舉公嘆曰民俗之弊一至此乎即嚴令禁之有一豪負老猾弗循約法乃捕至於獄且聞奏而重繩之自此境內肅然幼口全活者衆仍教以婚嫁之

宜禮節簡儉無浪侈費民雖始惑而終信叛教者遠矣
邑以治稱故刑部侍郎曾公暉巡視浙江首奏旌異辛
卯浙江鄉試公自簾外以夙望入補簾內所舉士時稱
得人壬辰滿三載考績赴京擢江西道監察御史初巡
通州倉再巡南城皆力去宿弊不事姑息乙未京師饑
監糶太倉米斗斛細給而多攬取息者輒斥弗聽民厚
德焉未幾奉勅往兩廣清理軍政凡三年遠惡州郡無
不身至從容逮踐根究始卒而親與定奪軍民交口稱

便丁酉廣東鄉試公監臨其事得名士尤多若涂編脩
其解魁也辛丑巡按應天等府南畿根本重地按治之
寄非老成御史不可公以先聲一旦蒞彼寬嚴適中人
謂得體及被璽書恤刑巡行咨詢悉心推鞠活誣陷三
百餘人周歲代歸滿九載矣遂擢雲南按察司副使公
居六察年久多陳言匡裨然又不欲株連毛舉自托於
骨鯁之名以傷朝廷大體故人多服公之量而亦憚公
之介也既而擁節臨滇恩威並著夷方懷服忽以足疾

懇疏乞休以去滇人圖留不能得上下嗟思不置年方五十五云方公之脫屣滇憲也道出貴陽余有內臺之拜未行公曰丙戌同進十又二人吾幸先取金紫茲得早歸天意不薄壺山風月當盡收入吾詩囊顧先生勿久累功名山水之樂不孤矣予諾而未及踐公歸閑三載每於壺山蘭水之區載酒遨遊觴咏為樂一日將斬木結廬以避俗偶遽得風症起伏二年竟不能治至是卒上遡宣德辛亥春秋五十有九所著有賓陽樓集凡

六十卷存於家其書法之妙則金薤琳琅在崖州大忠祠石刻可考也公之先晉江人世系遷徙具載會元陳公中撰封監察御史直菴府君墓誌中妣林氏贈孺人繼朱氏封太孺人配林氏亦封孺人子男三長守浩中書舍人娶郭氏次即守淵娶林氏三守洪娶陳氏女一淑鈿適山東提學僉事楊公琅之子溟孫男八茂椒茂梁茂栢茂榮茂棉茂中茂章茂塘嗚呼公問學有源委行已有本末器量過人政事可紀余輩素所推下者也

奈用未究而歸歸未久而沒君子惜之雖然觀其所立
可以永傳而不朽矣况彬彬孫子皆可望以克紹其世
者乎余故表之以垂後之人

南京戶部郎中同年方朝宗公墓表

方為莆田族姓之甲蓋江南之望也名位科第蟬聯不
絕自宋為盛然止於卿監經畧而未有登宰執者元世
稍歇入國朝又盛然止於郡守御史而未有正部院者
以韶所獲識若大行人柳東先生潮郡判東軒先生碩

學篤行宜致通顯然皆守初官不轉一階他不及二先生者有起家於其身至卿佐殆物無兩大而各厚其一歟此予於郎中方公朝宗有慨焉公上與宋廣南經畧使大琮俱出閩禮部郎中仁載之房世居烏石山下既生長右族濡染詩書習聞官儀知行已為政之槩而公又少穎敏獨異嗜問學長入郡庠名重儕輩景泰丙子舉福建鄉試明年天順丁丑登進士第韶泰同榜觀政刑部公觀政都察院實同寓舍公簡約清飭終歲徒

步時時讀律令為鑒戒若法為已設者性善飲然人非強
不沾唇不妄譏議人慨然有志於事功欲知見於世交
際持論微露克己頗為異意者所不合而韶愚直自遂
感而愧改者衆矣既而韶忝備刑官公亦拜南京戶部
江西司主事陞員外郎郎中皆於其曹曹事雖分省而
治至於差遺則惟材是使常擇以委公其事之所以難
者軍國財計倚重東南凡吳楚江淮之賦漕運外大半
留南京又賦禾稿秸以備馬政皆於江南北列倉場居

之執役其中多軍衛校卒時與主吏為奸利民行賄受
濫惡物即不與賄於斛秤暴以取贏使民常負其數公
受委監視蒞之以明察持之以廉勤奸弊衰少輸民蒙
惠於時戶部言有為郎官必數公成化乙酉歲侵所在
民飢時議行平糶法舉公主之措置有方竭其心力貧
富稱便歲己丑亦然右都御史太原周公戶部尚書鳳
陽陳公先後總督糧儲皆知公凡南京四十八衛倉常
命公總理之七年辛卯公以郎中滿六載考績於朝還

道病困卒儀真舟中時三月二十八日也春秋四十有
一適同年工部主事高邦寧在磚廠為治喪護至南京
子桓迎以歸莆塋於烏石山之原士大夫咸痛惜之公
為主事郎中兩得推封父尚與先生如其官母鄭氏累
封太宜人皆年七十有餘公負衣冠之冑隆孝友之行
而又材器動人使假以年高可邁祖烈平亦不失慎終
為二親榮乃今已矣公豈能瞑目哉噫將天欲壽方氏
之世不使其大發泄而遺其慶於後耶不然固不當遽

止是也公名海字朝宗以字行後又字廷宗配宋氏封
宜人子男三長即桓次模次恂女一公之葬也學士金
陵倪公既為之銘桓又請予表其墓予推天道人事而
致嘖嘆於再三列其大者如前不無望於桓與叔仲云

南京大理寺丞何惟孝公墓表

何公惟孝余天順丁丑同年也歷官刑部主事員外郎
郎中以至南京大理寺右寺丞其丞也善類皆以為喜
未數日即終於位又皆以為悲時成化七年辛卯六月

也方四十有二其年反葬於新淦何家山之原翰林傅先生為誌其墓而表碑未樹至十三年丁酉公之弟監察御史惟一按蜀將歸謂某宜為公之善名夫人能知之然寺丞常例不登史傳不有述焉時異世遠又何所因以考信乎蓋自厭常好異之學興士以庸行不足為相誇為奇節盛舉以痛快人心然考其自治則踈矣是謂無本事業惟孝不如此也為人以重人紀厚倫理為急其遇事可為則為之此其所以加人一等也惟孝於

事親未嘗有厲色情容而委曲以就其懽心祿不待厚
時輟以市衣服具旨甘世有達官文人兄弟俱登朝著
而不能同居惟孝於二弟先後舉進士皆養而教之資
用出入無異財二弟之事其兄亦如嚴師然與人交也
出中言以相語無少險誕遽罹禍不測極力營救或不
合誦言使聞之其人往往悔曰惟孝無心是吾過也於
是同年同志無不愛而敬之居官任職不憚煩碎甘淡
薄去華侈鞠獄視詞如何理直矣無勢亦白不直即上

官必與之辨四川中都屢有詔獄三法司議奏皆以委
惟孝推之卒得其辜功以報於是輿論歸重而大理之
命下矣惟孝於父子兄弟朋友之間迪知允蹈所謂先
立乎其大者大者既立則於他事宜無不用其情一時
賢士大夫皆屬意惟孝可階大拜而惟孝乃止於此惜
哉惟孝性敏而專為事必底於成少治舉業名動羣士
右會試遂為第三人學者多相從授經以取進士若吏
部員外吳珉山東僉事侯恂戶部主事孫中中書舍人

周紹榮監察御史李瑛行人薛珪進士吳珙樂鏞皆是也稍暇讀書不輟為文章簡暢有氣骨詩雜諸體冲淡和平皆藏於家方惟孝之往金陵也寓書於韶曰生平不厭學而奪於職事今茲南都留務甚簡將盡讀未讀之書足償吾願矣詎意中途連喪妻子而惟孝亦染病不起何斯文之不幸而吾黨之遽哀乎然考其所自立所謂一日之長百世之短吾必謂之讀書矣公諱衷世居新淦之蓮潭父貞代府教授累封刑部員外郎母徐

氏累封宜人兄弟六人善新城知縣純即侍御配宜人
習氏子男五慎益忱怡悌習與益俱先卒女二未行自
公之沒韶宦遊廢學甘於無聞其言何足以爲公之輕
重然追思往歲進同年官同曹居同巷而知公之胷次
學行為最詳蓋公之學可能而勤不可能孝友廉介可
能而誠不可能是宜述而書之嗚呼百世之下豈無聞
而興者乎尚有考於斯文

四川副使范誠夫公墓表

公諱純字誠夫號樸齋蘇州府嘉定縣人同予登天順
丁丑進士第又同拜官為兩京刑部屬成化辛卯予副
蜀憲公來僉司事予分道川北公偕持斧使者走邊盤
驗芻糧梁益地廣西南界番部道險惡多瘴毒凡憲臣
所不能至之處咸有公迹考覈虛偽徵理稽欠汨沒簿
領中踰年而後歸又權治戎事於松潘皆鞅掌勞力且
有戒心者公曰職耳為之愈勤故事舉而名彰川南北
二道分巡再歲糾愚繩奸風采肅然歲丁酉予以憲正

朝京公釐總司缺失賴以蓋覆明年予出蜀又明年松茂有警公督運至威州蠻來攻城據高山夾水架木飛擲入城人不能行如是者連日威幾不守公計招羌民數百夜伏伺山後旦鼓譟開前門若往攻狀蠻盡下趨我軍羌民已潛馳山頂用其飛木反擊之蠻敗去邊境自是遂安適瀘叙等處整飭兵備副使缺朝議擢公為之蓋自為郎至是二十餘年青衫華髮始進階四品而猶有遠役滿三年大圉都掌諸蠻部寧帖無事鎮守

大常侍掎軍實市珍禽以充貢奉一衛或賦白金四百
餘兩公白止之弗聽嘆曰吾不能與吾人為地豈可復
仕乎即以疾乞歸著練溪醉叟傳以自見其言曰醒者
能取大富貴久視而長生叟恒於醉者不能為彼之為
將一貴賤齊貧富等彭殤不知孰為高孰為遠而孰為
大小嗚呼可以窺其所存矣公不嗜飲寓言耳好讀書
其學最長於詩雖處冗劇不廢吟咏興至拈筆疾書格
調清雅稱為作家凡有詩十八巨帙文二帙藏於家公

之先溫人元季曾大父仁壽避地居嘉定生景逸是大父
生彛封南京兵部車駕司主事轉員外郎丁外艱改南
京刑部以至今官成化丁未十月朔卒春秋六十有二
娶金氏贈安人繼娶王氏封安人生子男二長曰升邑
庠生次曰豐女三孫男二嵩驥孫弘治元年二月八日葬
于城西頃涇先塋兆次公先自為墓志其十月予理鹺
事道嘉定哭弔公家升等以文請予諾之乃以二十八
言表其墓曰三十而仕六十止內省外臺官再徙洸洸

風雅見遺文過者必式范公墳

彭惠安集卷七

欽定四庫全書

彭惠安集卷八

明 彭韶 撰

書啓

與郡守岳公書

公祖大人閣下向入城府荷禮待委曲故舊之情固如是乎愧淺薄不足以堪之甚感甚感且以韶在治下必諳本土政俗使一一陳白退而深思凡吏於此者未聞

有此問乃於今見之嗚呼莆民一髮命脉其在閣下也
夫其在閣下也夫韶雖無似然自幼好談迂闊之論迄
今未改鄙見一二其曷敢不言自古為政者未始不以
教化為急然非人人詔之亦亦夫激勸之機耳若朱文
公王十朋與凡名公所至皆以表彰先賢為務為是故
也莆郡學後舊有鄉賢堂以祀先進然其地迫隘瞻敬
無所又所祀之人頗失之泛不足以勵後學故莆雖號
為文獻之邦然節義日衰難以救藥韶妄意莆中先進

之文章節義政事功業無出蔡君謨陳俊卿林光朝陳
宓李富若言論事迹著在信史與諸家文集無待備述
然或人猶謂蘇長公以進茶譏君謨有前丁後蔡之言
似不滿蔡者殊不知天理人欲同行異情蔡公之意主
於敬君丁謂之意主於媚上不可一槩論也蘇公之言
正猶望京謠前宗後杜之言特謂其鋤誅奸盜之相繼
耳非謂宗澤乃杜充比也不然曾子固在福州亦進荔
枝謂曾道君以口腹之欲可乎蔡公之學之節蘇明允

極慕之其子乃譏之豈有是哉或又謂朱文公嘗答門
人有陳無足道之言疑指正獻公者夫文公之學乃聖
人之學正獻誠不敢班然不特正獻為然如韓范文富
事業最為顯著類不能滿文公一哂何耶蓋文公之論
乃伊周格心之論而宋諸賢相不過漢唐名臣之流殆
難以此而貶正獻相業也艾軒則倡道於前復齋則扶
持於後子誠之忠孝兩全之五人者名位雖或不同然
為千載殊絕人物則一謂宜別立祠宇如廬陵忠節堂

之比使邦之人士以時祀之搜訪各家遺集置諸祠中庶後人有所矜式而挽回古風不難矣次則陳次升之入元祐黨籍陳文龍陳瓚之身死強虜鄭漁仲劉克莊之博學詞章是亦表表耳目他如林蘊陳靖靖之裔孫旅傳楫王邁方宇若陳均之流無非偉人乞下諸生論究或升配祠中亦無不可若鄉賢堂則所收頗寬故前林圭盧質中諸人皆與焉韶思近故江西僉憲陳敬其為人最為可欲而不可惡景泰間曾以十事進諫惜乎

不用故通判余耀始令太和方楊陳二公柄用而能強
項不為之撓後通判饒州歸而澹素終身故學正鄭濟
著書經大學中庸講說至今學者遵之故教授徐安祖
在安福最為善教與物無競此數人沒後人仰之不衰
若列之鄉賢堂中未必不愜公論也又鄉賢東一祠舊
因文公凡三至莆特設廟貌祀之陳復齋為之記後不
知何時廢為文昌祠夫文昌神學者所羞道為宜毀之
仍貌文公焉是亦風化第一義也莆中故蠻地淫祠特

多雖豪傑時出未之能革所祀神類不可曉奸黠之魁
每月指神生日飲錢祭之時出禍福語以懼村氓妖言
之興多由於此此間有儒士林邦俊酷怪淫祀乞特委
之俾行四境遇淫祀處悉令除毀就以所在廟宇依洪
武禮制設立鄉社鄉厲二壇使鄉老率其居民以時薦
祭庶足以祀土穀之神而不餒若敖氏之鬼矣莆中地
狹人稠寄食者衆死後人家多不肯容其殯歛往往置
諸荒堤斷岸之中連年暴露甚為可憫乞下里甲隨即

築埋亦古者當春掩骼之遺意也莆中舊有饑民倉七處多無蓄積近聞欲借富戶儲備此意甚善然饑民無歲無之非必十分荒歉然後謂之饑民也將饑而不能濟之待其既饑然後知發似未善又倉所與民相遠窮民饑餓之狀主守者多不得知至於開報名數只憑里隣供結因而張虛鼓偽真饑之民反不得食而得食者乃奸詐侵漁之徒也妄意欲善此法須倣文公社倉遺意或一鄉一里推舉平素有行誼知民艱苦者俾司出

納遇有饑民之家隨即開報關給若年豐則每年取息
二斗稍歉則蠲一斗大歉則全蠲息穀逐年如是俟十
年後甫無饑民矣且如維新里戴時暘其人曉大義又
勇於任事若使之專任此責免其泛役豈不大有成就
至各鄉各里皆求如其人任之則饑民之萬萬幸也他
如科派之擾差役之編吏卒之售其奸之類轉喉觸諱
區區難以盡言俟面既也不次天順甲申歲正月念五
日韶再拜

與姪原岳員外書

向屢得書并承厚儀老夫婦知感第懶拙失於修答非
自尊也九月初蒙恩陞刑部尚書此官莆人少拜老夫
幼學時志齋儒職聊為庄家出色不意年老推排獲藉
祖宗餘庇偶塵八座悚懼不寧深慮曠職不克善後耳
竊念賢姪年富志強今在郎署正宜勉建功名克辛克
勤不患不遠大也向改戶曹聞有厭意此甚不可隨所
寓而脩其職神理自不負人此處便可驗人識見地位

廣狹於此基矣勉之勉之將仕第六月來此不幸去世
苦痛不堪比日老妻久病危篤幸而無虞門戶蹭蹬奈
何便中書知不一

與長男濬圖世科事

莫恨當年志未酬更思黽勉紹箕裘雞窓獨掩槐花暮
蟾窟高攀桂子秋宦業成名存顯晦文章家數有源流
若能早立規模定方可終身事進脩右詩與子濬可勉
力以圖世科我於十一月十二日到貴州二十日上任

此地蕭條至甚然為官終得受用勝如廣蜀吾極安之
科舉在邇汝母在家宜十分勉力以慰親心他固不足
言也

與次男瀚勉世學事

昔眉山蘇洵少不喜學幾壯猶不知書年二十七始發
憤閉戶五六年乃大究六經百家書說與二子軾轍至
京宋歐陽文忠公獻其書於朝士大夫爭持其文二子
舉進士亦皆在高等於是父子名動京師而蘇氏文章

擅天下為人在世不可蹉跎過日子營營勞役亦損身體須是放懷將就得過也罷年紀高欲讀書宜少取熟讀漸漸有滋味覺得快樂也勉之勉之

彭惠安集卷八

欽定四庫全書

彭惠安集卷九

明 彭韶 撰

詩

寄愚庵陳家宰

終謚康懿

勒就功名上鼎彝
乞骸累疏達金扉
鴻恩此日加宮保
鶴髮來年是古稀
閒結耆英尋舊侶
新裁野服稱初衣
郡樓紫氣銷沉久
喜見清風太宰歸

送謝文祥御史謫南陵丞

零露一以墜原野生微涼金風轉蕭索四壁蛩吟螢夜
長不能寐攬衣起徬徨仰視天宇濶素月揚輝光奄忽
浮雲馳肅肅鴈南翔一啄諒易謀豈不足稻粱窮海壘
臣書籍爾遠見將羽毛尚摧落愴惶未能忘云胡抱孤
影悠悠岐路長願言隨陽歸以慰朝夕望

魏孔淵太守送岑嘉州集書韻復之

岑嘉州真名流生平浩氣橫清秋詞源瀕洞傾枚鄒春

江曉漲蛟龍浮從班解秩不復收從軍直到海西頭湖
沙三載踏驂騑長江萬里空悠悠間關西赴五馬侯郎
官御史青幕遊蜀嘉山水增清幽夜夜文光煥斗牛嘉
州嘉州知不憂遺文流落人重修當時炙手勢莫儔至
今寧有姓名留

送鍾岳賢姪之教上海

吾家田舍少聞儒分派橫塘頗讀書伯子僊郎超美秩
季方博士得新除風生池畔芹香細雨過庭前草色舒

文教從容真可樂慎母倚席度居諸

吾彭氏世居章江宗多務農派分橫塘一支乃有學
而仕者往歲原岳與其從父朝用俱為南京曹屬今
原岳陞戶部員外郎從弟鍾岳又拜上海縣教諭誠
繼美矣予生故居於鍾岳之行能無感乎為序詩以
送之

送方宜約郎中還朝

督餉時聞有好音東人懷惠起謳吟千倉露積餘紅腐

萬竈煙浮散綠陰寵辱不驚書最績便宜屢上罄忠忱
及瓜忽報趨朝去歲旱行看作傳霖

贈吳汝賢學士

南都佳麗正春風學士承恩出上宮鍾阜山光浮紫氣
秦淮樹色映房櫳詩吟真境無聲處人在金門大隱中
應念揄闕持節者籌邊何日可收功

書林風木為徐橋徐資時作

瑟瑟悲風起墓林親容何處可追尋九原徒抱終天恨

三釜難忘此日心
颯沓秋空時作籟
蕭疎白晝自成陰
謾將繪事傳遺迹
耳底無聲淚滿襟

貴州聞長男濬中鄉試

海國秋高有鴈來
鄉闈捷報好懷開
一經教子初登第
五薦從翁未入臺
北里遊程衝雪去
南宮捷報看花回
人生須念君親重
莫戀平居在草萊

送陳公甫還廣

白雲縹渺出林端
盤礴回風欲雨難
飲却神功歸洞去

故山依舊碧巔峴

彭惠安集卷九

欽定四庫全書

彭惠安集卷十

明 彭韶 撰

贊

最拙翁贊

司副周木之祖

道以拙存俗以拙美曷為最拙
兼是而已天巧其報視
爾所履不在其身必在孫子

柯孟時殿元遺像贊

高材遠韻清標粹學倫魁之中嶄然頭角玉堂賓詹歛
博施約四海望之北斗喬岳若究其用庶興禮樂

何廷秀侍郎畫像贊

許公在開元而家學益振申公在元祐而世德益昌由
包羅之廣大實踐履之輝光業在信史後人所望孰完
厥美而集其芳人也如愚闇然日章其必充遠到之器
而可合二公之長

彭文憲少保公贊

端重寡默瑚璉璋太學羣處衣冠必莊夙有令望入
閣遭喪解官忤旨歸斥奉常碩果存剝留翊嗣皇經綸
治平詞章未遑大魁首相科目有光

中山徐武寧王贊

諱達鳳陽人

天眷聖明篤生賢輔削平羣雄翼我洪武反狄陰山雪
恥千古攻城弗屠手完藏府錫爵分茅以有魏土奠彼
朔野莫敢予侮氣作山河不物以腐

開平常忠武王贊

諱遇春濠州懷遠人

長材偉貌猛如彪虎手提推埋早歸真主強漢偽吳席
卷以舉長驅入燕光復中土錫胙疇封以開鄂渚允矣
元戎赫然威武廟祀于通血食千古

誠意伯劉公贊

諱基括蒼人

天地方否曷仕於時運際休明仕止乃宜就桀就湯節
義奚虧大哉王佐燭物炳幾運籌制勝翼龍以飛昭回
制作文章是咨允為宗臣爾爵爾祠

岐陽李武靖王贊

諱文忠泗州盱眙人

勲戚之胄一世豪淹貫羣籍曾是六韜甲囊畫赤家有戰袍宋元故都兼舉並包宣威萬里實惟爾勞庸建上公以國于曹追王廟食沒膺寵褒

寧河鄧武順王贊

諱愈泗州虹縣人

惟武順王洸洸丈夫功叅佐命義旌之初氣蓋六軍視敵如無何堅不陷何強不鋤弔民禮士慰彼來蘇節鎮八州恩信以敷稽古凌煙褒鄂為徒

東甌湯襄武王贊

諱和鳳陽人

堂堂襄武沛豐故人股肱之佐心膂之臣徙下江東奄
舉甌閩摧堅撫順弔伐用申六合一統允藉元勲釋兵
以老情寄彌親功宗元祀李鄧其倫

翰林學士承旨宋公贊

諱濂金華人

春日載陽列宿繁張江流湯湯是為先生德容之粹文
名之高學問之長叅贊密勿翼導元良功在萬世其曷
敢忘

御史中丞章公贊

諱湓浙江龍泉人

元失其綱民率為厲出而濟時去以全義結廬匡山以
待聖世營田觀風莫辭勞動提兵于南邦人攸暨臺端
諤諤金作汝礪忠孝全歸心無所滯

黔寧沐昭靖王贊

諱英鳳陽定遠人

於惟昭靖早育潛宮知勇自奮克叙戎功戰守方隅間
寄攸崇西南大敵元室遺宗負固有年拒命弗通一鼓
平之百蠻率從即彼開府以錫世封

國子祭酒宋公贊

諱訥大名滑縣人

中州文獻遺緒可徵稽古力學飾車以行百僚讓德六
館蜚聲嚴而有愛樂育羣英乃叙教條爾準爾繩士皆
適用一人以寧制詞褒重吾道增榮

定興張忠烈王贊

諱輔河南祥符人

桓桓太師國之柱石討平南交以廣禹迹吏于其治職
方是入反側連衡餘孽復息再勞戎行以靖疆場百蠻
聞風來貢重譯美哉斯勲名昭罔極

平江恭襄陳公贊

諱瑄合肥人

轉粟江淮灌輸京師濬鑿河渠避海于危苑彼柳陰在
河之湄以息以薪行者如歸節其勞逸士飽而嬉歲漕
百萬卒倍而奇秩祀侯封令名允垂

少保忠宣黃公贊

諱福東萊昌邑人

番番老臣實篤忠貞南交內屬蕃屏是營公往殿之屹
然長城載安反側盡瘁竭誠十有九載優詔歸寧三孤
峻秩留後南京論文考德稱情令名

左都御史顧公贊

諱佐河南太康人

太康之墟卓有良臣烈烈汝介匪矯而真高簡不接一
榻凝塵尹正天府明察如神擢中執法實表縉紳赤棒
生氣公論以伸事歸臺閣弼予一人

少師文貞楊公贊

諱士奇吉安泰和人

秉節堅貞元氣所鍾早孤自奮婉美文忠江湖脫穎館
閣優崇知人畢達休休爾容匡輔四聖恩寵始終有文
有行有謀有功師垣眉壽一代儒宗

少師文敏楊公贊

諱榮福建建安人

文武兼資通人之器運籌帷幄攘寇千里擁佑三朝捧
日而起恩遇有加抑畏無替保身全名經邦掌制巍巍
當時燧燧來裔卓哉相業吁其難繼

少保文定楊公贊

諱溥湖廣石首人

江漢炳靈以發文明早居館閣晚踐孤卿懲艾思咎處
困而亨謙虛好學保泰以貞老成體國著龜典刑東里
建安參合成名二十餘年光輔太平

學士忠愍劉公贊

諱球江西安福人

於惟忠臣詞林之英沉思力學好義勇行太阿倒持執命腐刑乞戒履霜勿致堅冰不售蒙難乃險而傾褒贈官階節惠易名凜凜大節萬世猶生

祭酒顧庵胡公贊

諱儼江西南昌人

慥慥君子儒林之特匪耄于年亦邵其德不卑小官彌厲堅白蜚英翰苑物論允塞大放瑀琚深探隱蹟師表成均言行維則歸老東湖太子賓客

國子祭酒四明陳公贊

諱敬浙江慈溪人

行方而嚴學優而粹勢利紛如頽然無累抑抑德隅人
望知畏詞林重輕卜其進退師于國子身以為誨朋來
是樂不懈于位時有古廉於公作配

工部尚書文襄周公贊

諱忱江西吉水人

學博而邃禮和而恭茂著才猷爰作司空撫綏南服國
計以豐民無移粟歲不知凶惇大成裕沛乎有容沒而
尸祝人仰休風二十八宿孰能右公

國子祭酒文毅李公贊

諱時勉江西安福人

於乎剛士浩然正氣博聞有養學自中秘危言峻行歷
事四帝臣身百折臣心不替學士司成奸驕我忌荷校
願代門徒之義歸老于田名儒風致

副都御史思庵吳公贊

諱訥直隸常熟人

古貌古心學窺性理孝義幼聞實形踐履避迹儒醫監
國所禮乃教世胄乃司風紀卒貳留臺清德莫比篤老
幼書以忘憂喜修正遺文垂訓無已

永國武襄楊公贊

諱洪陝西漢中人

孰闕王畧直至便橋偏重勢成神器幾搖公往當之以
却天驕堂堂侯封冠彼百僚兒童知姓奸孽氣銷回鶻
羅拜呼韓趨朝壯哉虎臣不數嫖姚

吏部尚書文靖魏公贊

諱驥浙江蕭山人

百年眉壽天官上卿盛德雅望遠邇著稱海內達尊莫
之抗衡謙虛守禮簡朴性成好學不厭篤老精明使臣
就問特眷聖情辭免後事遺世準繩

禮部左侍郎文靖薛公贊

諱瑄山西河津人

力行好古進趨有程寤寐河洛以究春陵敷歷外憲大
棘之卿縲絰非罪復起而丞貳卿掌制以弼以承豈寶
遠物而志可行乞年以退維道之禎

左都御史軒公贊

諱輓河南鹿邑人

於惟廉士古之李及惟彼為通覆謂我激我豈激者百
年一日廉憲中丞風紀以植讒諛不行奸墨屏迹乃掌
邦宗勁節愈力老而復起憲臣是式

戶部尚書恭定年公贊

諱富直隸懷遠縣人

允穀年公古之遺直朴忠自與中外荐歷乃貳憲臺拊循疆場不合而歸蕭然一室輿論起公司徒是職保民薦賢人服公識百世聞風懦夫可立

吏部尚書忠肅王公贊

諱鞠直隸益山人

惟忠肅公松栢之姿鐵冠岳岳都憲攸宜三撫外服亦理戎機晚登太宰乃位宮師淡然無欲不識姜姬而况苞苴莫我敢施古三不惑於公見之

少保文達李公贊

諱賢河南鄧州人

河岳之英鍾為哲人體貌明粹踐履貞純潛心六籍濯
舊來新不二以止乃翕而信受知英皇忠信日親密勿
帷幄人望如神太平宰輔定策元勲

吏部左侍郎文莊葉公贊

諱威直隸崑山人

顯允文莊萬夫之特博學宏詞忠言遠識君子焉依樂
善無斃給事青瑣以登憲職撫綏朔南保釐勿失吏禮
之貳德音秩秩希文不相古今所惜

彭惠安集卷十